



La casa paterna dil poet da Laax sper la via principala.



«La sera sper il lag», forsa la poesia la pli enconuschenta da Camathias, avon la scola da Laax.

FOTOS: MAD

Rispostas occasiunales restadas

Laax regorda al scribent Flurin Camathias a caschun da siu anniversari da 150 onns

DAD ANDREAS CADONAU/FMR

■ **Laax renda honur al scribent e poet indigen Flurin Camathias che noda igl onn 2021 siu 150avel anniversari. Il chor mischedau ha lantschau las emprovas per in concert commemorativ instradaus da cuminonza cun il chor viril sin il gi da naschientscha dil poet ils 6 da mars. Il concert ei sulet ina da pliras occurrenzas planisadas egl onn proxim.** «Solemn ruavs cheu silla riva, d'umbriva stat il lag curclaus...». La rema intonada da *Gion Balzer Casanova* lai buca luat sulet l'olma romontscha. «La sera sper il lag» ha fatg e fa in considerabel viadi el mund, la speciala simbiosa da musica e text fascinescha. E da tgi deriva la rema? Tier quella damonda ston ils biars probabel ceder la risposta. Igl autur Flurin Camathias ei naschius ils 6 da mars 1871 a Laax e morts igl onn 1946 a Gion. Per igl autur ei «La sera sper il lag» ina da biaras poesias, ovras intonadas da numerus cumponists: Hans Erni, Duri Sialm ed auters. Gion Deplazes numna,



Flurin Camathias (1871–1946).

en ina artechel cumparius a caschun dil 100avel onn da naschientscha da Flurin Camathias, datier da 70 canzuns into-

nadas sin fundament dad in text dil poet da Laax. E Deplazes circumscriba igl autur da Laax: «Daventaus per la zucca il pli ferm e fritgeivel cantadur sursilvan.» In fatg che biaras cantaduras e biars cantadurs romontschs ein buca pertscharts ozilgi. Il president dalla Pro Laax, *Erwin Ardüser*, ha menziunau la preschientscha empau zuppada ch'hagi intimau la fundaziun da trer fil en guila per commemorar Flurin Camathias a caschun da siu anniversari da 150 onns. Denter auter cun in concert ils 6 e 7 da mars 2021 en scadin cass daus dil Chor mischedau e dil Chor viril Laax. Aposta per quei concert ein novas intonaziuns da remas dil poet da Laax sin rucca. Ovras cumponidas da *Gion Andrea Casanova* e *Giusep Tichuor*.

Divers arranschaments

Laax ha denton sargau il radius dallas activitads entuorn il giubileum dil poet da casa. Ils detagls ein aunc buca defini. Ardüser ha numnau la scola dil vitg che vegni a contribuir en ina moda ni l'autra.

Entretschai ein il museum e la biblioteca da Laax e medemamein separticipescha la Cularta al giubileum da Flurin Camathias. In disc cumpact cun canzuns che sebasan sin texts da Camathias ei previus ed ina scartira giubilara. Per quella ei in team d'auturas ed auturs vegnius incaricau d'illuminar entgins aspects da veta ed ovra dil poet. Il historicher *Sandro Buchli* da Laax sefatschenta cun biografia e poetologia digl autur; la historica *Bettina Berber* persequitescha ils contacts internaziunals e la vasta corrispondenza. L'influenza da Camathias sin la canzun romontscha vegn tractada dalla musicologa *Luana Decurtins*. Ina quarta contribuziun vegn dil teolog *Ursicin G.G. Derungs*, che tematisescha la rolla da Camathias sco augsegner. Per la creaziun grafica ei *Theres Jörger* responsabla ed edius vegn il cudisch dalla Chasa editura Rumantscha.

Spezialmein la vart musicala dil poet da Laax ei aunc oz buca ferg enconuschenta ed ei dat segiramein aunc da reschercar ina caussa ni l'autra. Il meina-

project Ardüser ha menziunau da gest haver retschiert da Breil in'ovra nunconuschenta che Camathias havevi scret probabel sin giavisch dad in chor. Ardüser ei dil meini ch'ei pudessi senz'auter esser ch'ina ni l'autra ovra «occasiunala» da Camathias schai aunc enzanua en in truchet sursilvan. Forsa en ils vitgs da Breil, Andiast ni Siat, leu nua che Flurin Camathias ha passentau sia veta sco pastur dallas olmas. Gest dad Andiast e Siat anora ha sur Flurin Camathias giu il casti dil Munt Sogn Gieri en mira. In liug ch'ha intimau el ad ina da sias ovras principalas. «Historias dil Munt Sogn Gieri» curdadas en emblidonna sco ses ulterius epos. Persuenter viva la rema ella canzun romontscha. Per da dretg igl onn 2021 a Laax. Il Chor mischedau Laax s'entaupa per las emprovas da cant per Flurin Camathias mingamai la gievgia allas 20.00 ella Sentupada a Laax.

Ulterius cantaduras ed ulterius cantadurs interessai al project ein beinevgni. Informaziuns en caussa porschan il president *Erwin Ardüser* ni il dirigent *Rest Giusep Tuor*.